

BOLETÍN MUNICIPAL

nº 1 | año 2011

Máis
Información



Concello de
Salceda
de Caselas



Saúda do Alcalde

Marcos David Besada Pérez

Índice

- 3 Entroido 2011
- 6 Máis Natural
- 8 Máis Humana
- 10 Máis Saúde
- 12 Máis Servizos
- 13 Máis Infancia
- 14 Máis Enerxía
- 16 Máis Deporte

EDITA
Concello de Salceda de Caselas

COORDINACIÓN E FOTOGRAFÍA
Gabinete de prensa do Concello de
Salceda de Caselas

DESEÑO E MAQUETACIÓN
magenta axencia de publicidade

IMPRESIÓN
Bolfer Artes Gráficas

D.L. VG 659-2010

Creo firmemente que en verdade hai tres clases de persoas no mundo: persoas que traballan, persoas ás que non se lle permiten traballar e persoas que non teñen en que traballar.

Nun momento complexo coma este, algúns temos moi claro o obxectivo de traballar incansablemente no camiño de conseguir unha NOVA SALCEDA na que vivir, traballar e desfrutar. Seguimos a percorrer todos xuntos un camiño na liña de satisfacer os deseños dun pobo, Salceda de Caselas, que está a ser unha referencia no conxunto do país, grazas sen dúbida ás veciñas e veciños que facedes do voso traballo diario un referente para o goberno municipal.

Ó longo destes catro anos, froito do incansable traballo dos homes e mulleres que me acompañan, temos avanzado de maneira considerable e hoxe son moitos e moitas os que abriron os ollos a unha nova Salceda, que é posible só superando as dificultades con esforzo e espírito emprendedor, construíndo día a día o concello que todos e todas desexamos. Como di unha cita de Séneca: "Non nos atrevemos a moitas cousas porque son difíciles, pero son difíciles porque non nos atrevemos a facelas".

Porque Salceda é obra de todos e todas, o Boletín Municipal é a porta aberta á información sobre o teu Concello, xa que cremos que canta máis información teña a xente, máis libre será para tomar as súas propias decisións. Dicía Castelao que "o verdadeiro heroísmo está en transformar os deseños en realidades e as ideas en feitos". Con este obxectivo, desexo que este novo Boletín sexa do agrado de todos e de todas.

Entroido 2011

Máis de 500 participantes cada ano nun desfile que reúne a milleiros de persoas que se achegan o Domingo de Entroido a Salceda. Esta é a edición número 13, a primeira foi no ano 1999.

O desfile sae da Praza da Devesa, segue pola rúa Vigo, Avenida de Galicia, rúa Victoriano Pérez Vidal, rúa Rollo e chega á Praza do Concello. O Concello reparte 4.000 € en premios. Por 4º ano faise tamén o Concurso de Coplas de Entroido.

VENRES 4 DE MARZO

Desfile de disfraces dos alumnos e alumnas dos centros escolares de Salceda
11:00 h. Praza do Concello

SÁBADO 5 DE MARZO

III Aberto de pincha Treze Catorze
16:00 h. Campo de fútbol Altamira
Festa infantil de disfraces
17:00 h. Parque Raíña Aragonta
Dinamik Dance
18:30 h. Parque Raíña Aragonta

DOMINGO 6 DE MARZO

Banda Cultural de Salceda
12:00 h. Praza do Concello
XIII Concurso de carrozas e comparsas
16:00 h. Saída da Praza da Devesa
IV Concurso de coplas de Entroido
19:00 h. Praza do Concello
Verbena co GRUPO LIMÓN
20:30 h. Praza do Concello

LUNS 7 E MARTES 8 DE MARZO

Verbenas de Entroido en A Feira e Castro Barreiro
Presentación das súas carrozas e comparsas
Martes ás 17:00 h. na Praza do Concello







Máis Festa

ANTONIO GONZÁLEZ PÉREZ

PRESIDENTE ASOCIACIÓN XUVENIL NÓS SOMOS NÓS (CASTRO BARREIRO)

1. Principalmente cabe destacar a rivalidade entre os dous barrios veciños que compiten en carroza, comparsa, orquestras,... Esta rivalidade chega ata límites insospeitados como por exemplo; esperar ata o último momento para anunciar as festas, normalmente o Venres de Entroido, para que o outro barrio non o poida superar; espiar ós veciños do barrio rival para intentar descubrir como vai a ser a súa carroza e así poder burlarse deles o día do desfile; tamén se colocan unha grande parrillada de altofalantes dirixidas ó barrio da Feira para intentar molestar ós que acoden alí a festa. En fin, un innumerable número de argalladas co fin de augarllas as festas ó barrio contrincante. Tamén cabe destacar as coplas, "chistes", que van dirixidas ós veciños do barrio contrincante co fin de dar a coñecer anécdotas acontecidas ó longo do ano e que son publicadas nos pasquínns da festa.

2. Cada ano decídese unha comisión formada pola xuventude do barrio, a cal é a encargada de distribuír o traballo en distintos grupos para organizalo todo. En canto á colaboración dos veciños todos se implican dunha maneira ou outra, ben sexa desempeñando tarefas na comparsa, carroza, festa, etc...

3. Ben, coma sempre por estas alturas. Pouco a pouco imos concretando cada detalle para que todo estea a punto para ese día. Respecto ó tempo que levamos traballando, máis ou menos coma sempre, nin moiño nin pouco... porque aínda que pareza mentira este tema tamén é un segredo.

4. Os veciños da Feiriña saben que non teñen nada que facer, así que non te esforces velliña que con nós non podes. Nós somos Nós, Fortaleza Invencible.

1. ¿Cal é a diferenza entre o Entroido dos vosos barrios e os demais entroidos que se celebran no País?

2. ¿Como vos organizades para sacalo todo a diante? ¿Que tal é a colaboración dos veciños e veciñas?

3. ¿Como van os preparativos deste ano? ¿Levades moito tempo a traballar?

4. Aproveitade para mandarlle algún recadiño ós vosos rivais

ANA ÁLVAREZ PÉREZ

PRESIDENTA ASOCIACIÓN XUVENIL ENTROIDO (A FEIRA)

1. A diferenza do noso Entroido, a parte de non estar claramente datado, non nace na Idade Media como alegoría do carnal, días antes da entrada na Coresma, tempo de rezo e abstinencia. Por iso en Salceda non se pode chamar Entroido, é mais ben un carnaval, quizais influenciado polos moitos emigrantes en Latinoamerica que traían e importaban as típicas comparsas e carrozas que se podían ver en Brasil, Arxentina, Colombia, Cuba ou Venezuela. Segundo contan, naceu este Carnaval, non se sabe cando, dun pique entre dous seráns que había, un no eido dos da Gaiteira e outro nos do Barral.

2. A organización consta dunha comisión formada polos mozos e mozas do barrio, que se encarga de contratar as orquestras e de recadar diñeiro ao longo do ano organizando diferentes actividades. Un mes antes do Entroido pasan a participar todos os veciños que queiran na elaboración das carrozas e comparsas, nun recinto habilitado para tal fin, quen non sabe cravar un cravo, escofina no poliespan, o que non sabe facer nada encárgase de limpar o moito escombro que se amontoa, sempre hai traballo para todos.

3. Ao final pasa como todos os anos, a elaboración da carroza comeza un mes antes, con ritmo lento e pausado, falto de mans para traballar... Ao chegar a última semana, cando xa cheira o carnaval, onde os apuros e as carreiras están á orde do día, é cando aparecen moreas de persoas para botar unha man. Da igual que o carnaval cadre alto ou baixo nas datas, o último mes é cando se empeza cos traballos.

4. Ben, aquí vén a parte que máis nos gusta. "Castríño desde estas páxinas que nos brinda o Concello vamos a darvos dous consellos; 1º aínda estades a tempo de retirarvos e non facer o ridículo na Esfarrapada, xa sabedes o dito "unha retirada a tempo vale máis ca unha vitoria", 2º " VISTO PARA SENTENCIA, A FEIRA NON TEN COMPETENCIA".



A senda vai dende As Pontes (Santa María) ata O Rubal (Picoña), pasando pola Laxe en San Xurxo

O Concello agradece ás persoas propietarias das case 200 parcelas a cesión voluntaria e gratuíta dos 5 metros de dominio público hidráulico para poder levar a cabo esta obra

O Concello de Salceda de Caselas co financiamento da Confederación Hidrográfica do Miño-Sil levou a cabo a construcción e acondicionamento da Senda Fluvial do Río Caselas, que vai dende As Pontes (Santa María) ata O Rubal (Picoña), pasando pola Laxe en San Xurxo. Cun orzamento de case 350.000€ recuperáronse 2,3 km. de marxes eliminando especies invasoras, plantando árbores de ribeira e eliminando vertedoiros incontrolados de lixo.

En canto á obra civil, a senda, de dous metros de ancho, levou na maioría de treitos bordo de pedra Gris-Salceda. Empedráronse varios tramos con perigo de asolagamento e os cruces das estradas para maior seguridade dos viandantes, ademais dalgunhas zonas a resaltar como a saída no Rubal ou o entorno do muíño da Laxe. Construíronse varios pasos para sortear as canles de auga e executouse unha ponte no Rubal sobre o río Caselas. Tamén se acondicionou o entorno da fonte das Covas, mellorando a imaxe desta e colocando novas mesas de pedra ademais de arranxar as existentes. Ademais, creouse unha nova área no entorno do muíño de Marcial. É de agradecer a cesión voluntaria e gratuíta de case 200 parcelas polos seus propietarios nos 5 metros de dominio público hidráulico para poder levar a cabo esta obra.



Máis Natural



Recuperáronse 2,3 km. eliminando especies invasoras, plantando árbores de ribeira e eliminando vertedoiros incontrolados de lixo




Rehabilitáronse catro muíños chamados "Covas", "Laxe ou dos Cregos", "Figueiras" e de "Marcial"

Os muíños do río Caselas

Como proxecto complementario, creouse o Parque Etnográfico dos Muíños do Río Caselas que conta con catro muíños chamados "Covas", "Laxe ou dos Cregos", "Figueiras" e de "Marcial". Estes muíños foron rehabilitados e postos en valor quedando o da Laxe como muíño museo e en funcionamento. Este foi un proxecto financiado polo Concello de Salceda e a Consellería de Medio Rural a través das subvencións a proxectos dinamizadores financiados con fondos europeos.

Guía micológica do río Caselas

Oscar Requejo, veciño de Salceda de Caselas e secretario do Grupo Micológico Galego vén de editar a Guía Micológica do río Caselas, na que o Concello de Salceda de Caselas colabora financiando este proxecto, que o considera complemento perfecto á Senda e ó Parque Etnográfico dos Muíños do Río Caselas. Este é o primeiro libro sobre a micología en Salceda de Caselas escrito por un dos melhores expertos na materia en toda Galicia, Oscar Requejo. Con esta publicación pretende darse a coñecer algúns dos cogomelos que habitualmente podemos atopar no entorno do noso río e poder catalogalos. Podemos encontrar os cogomelos más habituais, pero tamén os más raros. Temos que ter en conta que hai que respectar os fungos e non facer un mal uso deles, xa que nas últimas décadas sufrieron constantes agresións ata o punto de que algúns están en perigo de extinción.



Con esta publicación pretende darse a coñecer algúns dos cogomelos que habitualmente podemos atopar no entorno do noso río



A superficie total de actuación ascende a 3.670 m², dos que 2.110 m. corresponden á ampliación de beirarrúas

Máis Humana

As Rúas Joaquín Fernández Sestelo, Victoriano Pérez Vidal e a Avda. de Galicia amosan unha nova cara

O Concello de Salceda de Caselas humanizou o corazón da vila cun orzamento de 459.655,33 € financiados co Fondo Estatal para el Empleo y la Sostenibilidad Local 2010.

Para a execución da obra, a empresa adxudicataria, COVSA S.A., que conta con máis de trinta traballadores de Salceda, utilizou granito Gris-Salceda das canteiras de Entenza. Ademais substituíronse as canalizacións de auga, saneamento, telefonía e electricidade que precisaban de recambio. A superficie total de actuación ascende a 3.670 m², dos que 2.110,60 m. corresponden á ampliación de beirarrúas.

A sorpresa desta obra estaba debaixo do asfalto: un tramo do antigo empedrado da estrada Salvaterra-Porriño que data dos anos 40 feito con pedra das canteiras do Coto da Cruz, a cabalo entre as parroquias de Picoña e Santa María de Salceda. A súa conservación pon en valor un elemento histórico que realza a memoria do lugar.



Durante a obra descubriuse un tramo do antigo empedrado dos anos 40



Na obra empregouse granito Gris-Salceda das canteiras de Entenza



O 23 de outubro de 2010 celebrouse a inauguración oficial

Máis Humana



As persoas encargadas da inauguración foron as de maior idade das tres rúas



A ampliación da zona azul, a creación de novos aparcamentos gratuitos e o traslado da parada de taxis conseguén mellorar a fluidez no tráfico


Uns paneis de metacrilato con reproducións de fotos antigas permítennos recordar como eran as rúas hai anos

Tamén se instalou mobiliario urbano, como farois, bancos, papeleiras, árbores... e botou a andar o proxecto Rúas Vivas, que a través de paneis de metacrilato con reproducións de fotos antigas das rúas obxecto da humanización, mostra ós viandantes a evolución da zona.

Unha serie de medidas de circulación conseguén mellorar a fluidez no tráfico: os cambios no sentido da circulación, a limitación a vehículos pesados, a ampliación da zona azul e a creación de novos aparcadoiros gratuitos. Tamén se trasladou a parada de taxis para a rúa Joaquín Fernández Sestelo.

No acto de inauguración estiveron presentes diputados/as no parlamento español, diputados/as no parlamento galego, alcaldes/as, concelleiros/as e representantes de colectivos e asociacións do Concello. As persoas encargadas da inauguración foron as de maior idade das tres rúas.

Más Saúde



Salceda cedeu ao Sergas a parcela de 3.001,75 m² situada na Devesa para o Centro de Saúde

O venres 25 de febreiro de 2011 o Concello de Salceda de Caselas cedeu gratuitamente a propiedade da parcela ó Sergas para a construción do novo Centro de Saúde, despois de obtela en propiedade o 22 de decembro de 2010 mediante a ocupación directa dos terreos. A parcela resultante desta ocupación ten unha superficie de 4.140,33 m² situada na Devesa, no entronque da rúa Mártires de Sobredo, dos que 3.001,75 m² corresponden á parcela específica cedida para o centro de saúde e 1.138,58 m² corresponden á rúa.


Para delimitar esta parcela houbo que aprobar previamente o PERI-UE-2, proceso que comezou en xullo do ano 2007 para conseguir os terreos coa cualificación urbanística sanitaria inexistente ata ese momento nas normas urbanísticas de Salceda, tal como esixía o SERGAS; un proceso longo e cheo de traballo e dedicación que se aprobou definitivamente polo Pleno do Concello o 30 de setembro de 2008.

A ocupación directa é froito da necesidade urgente de obter un servizo público sanitario, o novo Centro de Saúde, que satisfaga as necesidades dos veciños e veciñas de Salceda. Este proceso vai

O proceso comezou en 2007 para conseguir os terreos coa cualificación urbanística sanitaria inexistente ata ese momento nas normas urbanísticas de Salceda

beneficiar tanto ó Concello, que vai obter gratuitamente os terreos, única maneira de conseguilos, así como os propietarios que ven revalorizadas as súas parcelas ó darse un paso máis para o desenvolvemento urbanístico do ámbito no que se atopan, ademais de abonárselles os bens existentes nelas. A crise económica e a falta de promotores inmobiliarios interesados en desenvolver o PERI obrigou ó Concello a acudir á Ocupación Directa como única solución.

Os ata agora propietarios dos terreos, asistiron o 22 de decembro ó salón de plenos do Concello para asinar as actas de ocupación. Posteriormente trasladáronse ós terreos onde en compañía do alcalde, Marcos Besada, o Concelleiro de Urbanismo, Fortunato Álvarez, a arquitecta municipal e un perito agrícola examinaron as parcelas afectadas. Os propietarios ocupados conservan os mesmos dereitos urbanísticos que tiñan antes da ocupación, que son os mesmos que teñen cada un dos restantes propietarios do ámbito PERI (32.026,69 m²). Se no prazo de catro anos non se ten procedido á execución da UE-02, os propietarios ocupados teñen dereito a que se inicie a expropiación dos seus terreos. Así mesmo o



Anteproxecto do Centro de Saúde realizado polos arquitectos Javier A. Franco e Vicente Pintos

A previsión é que nos orzamentos da Xunta para o 2012 se inclúa a construcción do Centro de Saúde de Salceda

aproveitamento urbanístico correspondente ás fincas ocupadas inscríronse no Rexistro da Propiedade. Ós titulares das parcelas, que foron informados en varias reunións do proceso, recoñéceselle o dereito ó aproveitamento urbanístico que lle corresponde podendo vendelo, permutalo, herdalo, etc.

O 5 de maio de 2010 o SERGAS deulle o visto e prace á parcela ofrecida polo Concello e solicitou a posta a disposición para a normal execución das obras. O xerente de atención primaria do SERGAS, Javier Caramés, manifestoulle ó alcalde, concelleiros e Plataforma en defensa dos servizos sanitarios de Salceda que o Centro de Saúde de Salceda é prioridade número un para este organismo. De feito, o Concello xa ten o anteproxecto realizado polos arquitectos Javier A. Franco e Vicente Pintos que supón unha superficie construída total de 1.949,86 m². A previsión é que nos orzamentos da Xunta para o 2012 se inclúa a construcción do citado Centro de Saúde.

O Concello asume os gastos derivados da urbanización e facer chegar as infraestruturas necesarias ó Centro de Saúde que serán simultáneas á súa construcción, como en calquera licenza. Os sistemas de abastecemento de auga e saneamento, suministro eléctrico, alumeadoo e telefonía xa están a pé de parcela, na rúa Mártires de Sobredo.



O 22 de decembro os ata agora propietarios visitaron os terreos, en compañía do alcalde, Marcos Besada, o Concelleiro de Urbanismo, Fortunato Álvarez, a arquitecta municipal e un perito agrícola



O depósito ten 3.000 m³ de capacidade, un diámetro interior de 25 m. e unha altura de 6,5 m.

As actuacións teñen como obxectivo dar maior capacidade hidráulica ao sistema de abastecemento de Salceda

A Delegada da Xunta, Lucía Molares, visitou Salceda para comprobar o estado de execución das obras do novo depósito de augas e obras complementarias.

As actuacións teñen como obxectivo dar maior capacidade hidráulica ao sistema de abastecemento a través dun aumento do caudal dispoñible, proporcionando a mellora da calidade da auga tratada, segundo se sinala dende a Concellería de Medio Ambiente.

A empresa CRC Obras y Servicios ten executado o 76% da obra “Mellora do Abastecemento de Augas a Salceda dende O Porriño” que foi adxudicado por un importe de 1.604.164 €.

Esta obra é froito do convenio asinado entre a Xunta de Galicia e os concellos de Salceda de Caselas e O Porriño para a execución destas obras de mellora do abastecemento. A Empresa Pública de Obras e Servizos Hidráulicos achegará un 83,33% en dúas anualidades e o Concello de Salceda de Caselas contribuirá ao financiamento do 9,53% do proxecto, mediante unha achega de 200.030 euros, e o Concello do Porriño achegará o 7,14%.

O depósito ten 3.000 m³ de capacidade, un diámetro interior de 25 m., unha altura de 6,5 m., un grosor de parede de 0,35 m. e soleira de 0,50 m. Este depósito vaise conectar coa rede de abastecemento existente no núcleo de Salceda mediante un tubo de polietileno. O equipamento de bombeo disposto consta de bombas de 50 kw de potencia cada unha, que entrarán en funcionamiento alternativamente.

Tense previsto que en agosto, o casco urbano de Salceda xa poida usar a auga provinte do río Oitavén.

Máis Servizos





Uns 60 nenos e nenas fan uso deste comedor dende o primeiro día

Máis Infancia



O servizo será de catering xestionado pola ANPA



Preparáronse dous comedores, unha sala multiusos e dous baños adaptados

O Concello rehabilitou a vella casa do conserxe do CEP Altamira para abrir nela un comedor escolar

En resposta ás demandas das nais e pais do alumnado, a Concellería de Ensino do Concello de Salceda rehabilitou a vella casa do conserxe do CEP Altamira para abrir nela un comedor escolar que xa está a funcionar tras o comezo do curso escolar. Os nenos e nenas do CEP Altamira e do CRA Raíña Aragonta que o desexen xa pueden quedar a comer nestas instalacións. Uns 60 nenos e nenas fan uso deste comedor dende o primeiro día.

A obra contou cun orzamento de 28.470,03 € de fondos do FEIL 2010. Preparáronse tres salas nas que se inclúen dous comedores, unha sala multiusos e dous baños adaptados. O número de prazas que atenderá é de 80 con posibilidade de 2 quendas (total: 160 prazas). O servizo será de catering-Office xestionado pola ANPA.

Estas melloras están enmarcadas no Plan de Melloras Educativas 2007-2011 que o goberno municipal marcou como prioritaria para esta lexislatura. É un paso máis na conciliación da vida laboral e familiar para aqueles pais e nais que estean traballando e non poidan comer cos seus fillos. A ANPA vai ser a encargada de xestionar estas instalacións como ocorre en concellos veciños.

FOMENTANDO A CULTURA

Dende a Concellaría de Cultura véñense patrocinando diversas publicacións como "Manuel Pérez y Pérez, un salcedense no esquecemento" de Xesús Presa Vaqueiro, "Os Bolechas, vacacionás no Pazo de Pegullal", ou "Guía micolóxica do Río Caselas" de Óscar Requejo, que forman parte xa do patrimonio cultural de Salceda.

Nos vindeiros días engadirase "Lembranzas da miña terra" de Florencio Fernández, que fará un percorrido pola historia do barrio da Feira.

Así mesmo, o Concello ten patrocinado traballos discográficos como "Cinsa Namorada" de Tino Baz, "Que o pano non me namora" da Señora Carme ou "Cores do Atlántico" con Socorro Lira.



A nivel municipal patrocináronse os discos "O Coro Polifónico de Entenza canta para ti", e "Pparafusxo", do percusionista salcedense Roberto Oliveira.

A Concellaría de Cultura financiou tamén un puzzle dos Bolechas que amosa a estes singulares personaxes na entrada do Pazo de Pegullal, e co cal se completa un catálogo de publicacións que seguirá a medrar con temas que contribúan a enriquecer a cultura de Salceda.

PROGRAMA DE ALIMENTOS

A Concellería de Voluntariado, que dirixe Mónica Vizcaya, repartiu a terceira remesa de alimentos para xente necesitada do Concello de Salceda de Caselas cun volume de case 5.000 kg.

O Programa de Alimentos xorde co propósito de distribuír alimentos de primeira necesidade ós casos derivados dos servizos sociais ou a persoas que veñen por iniciativa propia. Este programa faise grazas a colaboración do Fondo Español de Garantía Agraria e a Cruz Vermella. Os alimentos proceden dos excedentes comunitarios de produtos de intervención (arroz, manteiga, leite en po, etc.). Dende o ano 2008 lévanse entregado entre as familias, que ascenden a máis dun centenar, uns 15.000 kg.

Os alimentos repártense a través do Programa de Voluntariado, que aporta dende estudiantes universitarios ata amas de casa ou traballadores/as en

Máis
Enerxía



beneficio da comunidade para facer os traballos de empaquetado e distribución.

Mónica Vizcaya sinala que "en Salceda hai unha concellería que loita polos intereses das persoas que más o precisan e que está continuamente traballando para traer todos aqueles servizos que melloren a calidade de vida da súa cidadanía".



APOIO Á INFANCIA

A Concellaría de Ensino, Promoción do Emprego e Formación do Concello de Salceda de Caselas ten un programa nos dous centros escolares de infantil e primaria existentes no municipio. Trátase dunha Aula Matinal Municipal para nenos e nenas de tres a doce anos, cuxos pais comezan a súa xornada laboral antes de que os rapaces entren na escola. Haberá posibilidade de almorzo para aqueles que o soliciten. O programa está operativo no Comedor Escolar de Salceda dende as 7 da mañá. As solicitudes fanse na páxina web do Concello. Este programa está cofinanciado pola Consellería de Educación, polo Concello de Salceda e os pais e nais.

A CASA DA CULTURA DUPLICA AS PERSOAS USUARIAS

Os datos demostran que a rehabilitación como Casa da Cultura do anterior Concello foi todo un acerto. As persoas usuarias das computadoras con acceso a internet pasaron de 449 no mes de marzo a 938 no mes de setembro, tendo o teito no mes de agosto con 1.104. As visitas á páxina web da biblioteca pasaron de 3.959 no mes de xaneiro a 6.549 no mes de agosto, alcanzando un máximo de 9.315 en febreiro. Os socios/as da biblioteca ascenderon de 300 en marzo ata 1.312 en setembro. Tamén as crianzas teñen o seu lugar neste edificio, cunha media de 15-20 nenos e nenas diarias. O número de usuarios da aula de lectura varía, dependendo da época do ano, pero pódese estimar unha media de 20-30 persoas diarias. O servizo de OMIC e OMIX atendeu no pasado ano a 2.144 persoas. Os servizos complétanse con rede wifi e prensa diaria.



NOVA ANTENA PARA INTERNET, TELEFONÍA E TDT

A empresa pública Retegal en colaboración co Concello de Salceda de Caselas, a Deputación de Pontevedra e a Comunidade de Montes de San Xurxo instalou unha torre de comunicacións metálica de 22 metros de altura nas Curuxeiras, en San Xurxo. O Concello de Salceda de Caselas xestionou a cesión dos terreos coa Comunidade de Montes, ademais de aportar un 10% do proxecto.

Dende a torre emitirase o sinal de TDT, mellorando así a cobertura, e o servizo de Wimax Rural para achegar internet ás zonas rurais. O custe do acceso a internet será como máximo de 17 €/mes e o de telefonía de 6 €/mes cunha alta de 59 €. Ademais ofrecerase acceso wifi gratuito na Praza do Concello.

Este servizo dará cobertura a un 96,73% da poboación de Salceda. Concretamente vai permitir que 1.107 persoas (14% do total) que agora non teñen posibilidade de conexión poidan ter acceso á banda ancha.

A empresa Iberbanda será a responsable da comercialización do servizo, sempre baixo a tutela e supervisión da Deputación de Pontevedra. Máis info en www.repostrar.depo.es.



Máis
Enerxía


3 NOVOS APARCADOIROS

Os novos aparcadoiros están na rúa J. Fdez. Sestelo, detrás da Praza de Abastos e en Rosalía de Castro. Son aparcadoiros disuasorios e gratuitos que aportan máis de 100 novas prazas, sumándose ás más de 500 prazas xa existentes nos 5 espazos para estacionar sen límite de tempo.

A finalidade é facilitar zonas próximas ós condutores para que aparquen correctamente, mellorando a fluidez na circulación dos vehículos e permitir unha cómoda mobilidade ós peóns.

Para informar do bo uso das distintas zonas de aparcadoiro, fixose a campaña "Non deas a nota", explicando cales son as condutas a mellorar no día a día.

A realidade é que en Salceda é doado atopar onde aparcar preto de onde te dirixes.



842.000 € NAS PARROQUIAS

Co obxectivo de repartir os investimentos entre as parroquias e a vila, o Pleno 10/2009 celebrado o 22 de outubro de 2009 aprobou a inclusión dun total de 12 obras nas sete parroquias. Incluíronse dotacións de servizos como saneamento, pavimentación de estradas, reformas no alumado e construcción de bancadas no campo do Penedo Redondo.

Os traballos supoñen un investimento de 842.000 € e lévanse a cabo coa colaboración da Deputación de Pontevedra no marco do Plan de Investimentos 2009-2011. O Concello foi o encargado de decidir as obras a realizar e de elaborar os proxectos que posteriormente a Deputación licita e contrata.

Listaxe de obras	842.000,00 €
PAVIMENTACIÓN DE CAMIÑOS EN ENTENZA	109.928,40 €
Apertura de dúas novas vías de 6 m. en Ascensión, pavimentación en Cerqueiral e ensanche e asfaltado en Carrilla.	
PAVIMENTACIÓN DE CAMIÑOS EN PARDERRUBIAS	91.664,53 €
Ensanches e asfaltados en Reporteiro e en Revolta e beirarrúas na rúa Joaquín Fernández Sestelo.	
PAVIMENTACIÓN DE CAMIÑOS EN SANTA MARÍA	118.497,47 €
Apertura dunha nova vía entre Casás e Maceira, tres badéns na rúa Pontevedra, J. F. Sestelo e Avda. Galicia, asfaltado no entorno da Praza de Abastos e saída cara O Porriño na Lagoela e beirarrúa na rúa Rosalía de Castro (fronte ao CEP Altamira).	
PAVIMENTACIÓN DE CAMIÑOS EN SOUTELO	33.191,16 €
Construcción de cunetas e pavimentación no Alto do Cairo ata o Agro e pavimentación de dúas vías no Casal.	
PAVIMENTACIÓN PISTA BOUZAPANDA-AMEIXEIRA	55.389,16 €
PAVIMENTACIÓN DE CAMIÑOS EN BUDIÑO	34.183,61 €
Ensanche, asfaltado e apertura de cunetas desde Coto a Rubindo e pavimentación en Barral e Costeira.	
PAVIMENTACIÓN DE CAMIÑO EN COTELLO-ENTENZA	32.308,18 €
PAVIMENTACIÓN DA ESTRADA BORRALLIÑO-SOBREDO (SOUTELO)	64.932,11 €
Inclúe remodelación rotonda, traslado marquesíña, creación de punto limpo e prazas de aparcadoiro.	
PAVIMENTACIÓN DE CAMIÑO CHAN DO MONTE-BORRALLIÑO	53.558,91 €
SANEAMENTO EN OUTEIRO (SAN XURXO), A PICOÑA E PARDERRUBIAS	149.672,11 €
Saneamento e pluviais en Buraca-Pedrapinta e saneamento en Outeiro, Revolta e Agros (Parderrubias).	
REFORMA DO ALUMEADO PÚBLICO EN DIVERSAS ZONAS DO CONCELLO	70.018,39 €
Substitución de cableado e novos puntos de luz nas sete parroquias.	
NOVA BANCADA DO CAMPO DE FÚTBOL DO PENEDO REDONDO	28.972,00 €



CAMPO DE FUTBOL DO PENEDO REDONDO

O Concello de Salceda conta, por fin, co tan ansiado Campo de Fútbol de herba artificial do Penedo Redondo. O pasado 7 de novembro inaugurábase esta instalación, que dende entón está a ser utilizada polas Escolas Deportivas Municipais, o Caselas F. C. e os equipos de fútbol afeccionado de Parderrubias.

O Concello de Salceda e a Deputación de Pontevedra participaron e financiaron a construcción desta infraestrutura. O Concello encargouse da reforma dos vestiarios, o peche exterior e a iluminación. Así mesmo correu cos gastos do 50% das bancadas e o 25% do céspede. Adecuouse tamén o exterior do campo, obra que foi levada a cabo pola Deputación de Pontevedra co apoio de persoal municipal.

Nun orzamento total de 690.076,25 € a Deputación de Pontevedra aportou 404.676 €, e o Concello de Salceda os 285.400,25 € restantes, sendo a maior inversión feita polo noso Concello en materia de deportes.